

禽虫典

禽蟲典第六卷

鳳凰部紀事

路史大庭氏之膺籙也適有嘉瑞三辰曾輝五鳳異色

無懷氏世用太平鳳凰降龜龍閣

太昊伏羲氏命蜚龍氏職圖爰因尊事以爲禮儀而天下治長離來翔

三墳云因鳳來而作樂長離者鳳也爰作荒樂

歌扶袞咏網罟

按扶袞歌即鳳來之頌

以鎮天下之人

尙書中候黃帝時天氣休通五行期化鳳凰巢阿閣謹於樹

春秋合誠圖黃帝遊元扈洛水上與大司馬容光等臨觀鳳皇銜圖置帝前黃帝再拜受圖

春秋緯黃帝坐于扈閣鳳皇銜書致帝前其中得五始之文焉

韓子十過篇昔者黃帝合鬼神於泰山鳳凰覆上作爲清角

竹書紀年黃帝卽位居有熊五十年秋七月庚申鳳鳥至帝祭於洛水

注

庚申天霧三日三夜晝昏

帝問天老力牧容成曰於公何如天老曰臣聞之國安其主好文則鳳皇居之國亂其主好武則鳳皇去之今鳳皇翔於東郊而樂之其鳴音中夷則與天相副以是觀之天有嚴教以賜帝帝勿犯也

召史卜之龜燹史曰臣不能占也其問之聖人帝曰己問天老力牧容成矣史北面再拜曰龜不違聖智故燹霧既降游於洛水之上見大魚殺五牲以醺之天乃甚雨七日七夜魚流於海得圖書焉龍圖出河龜書出洛赤文篆字以授軒轅接萬神於明庭今寒門谷口是也

說苑辨物篇黃帝卽位惟聖恩承天明道一修惟仁是行宇內和平未見鳳皇維思影像夜寐晨興於是乃問天老曰鳳儀何如天老曰夫鳳鴻前麟後蛇頸魚尾鶴植鴛忠龍文龜身燕喙雞喙駢翼而中注首戴德頂揭義背負仁心信智食則有質飲則有儀往則有文來則有嘉晨鳴曰發明晝鳴曰保長飛鳴曰上翔集鳴曰歸昌翼挾義衷抱忠足履正尾繫武小聲合金大音合鼓延頸奮翼五采備舉光興八風氣降時雨此謂鳳像夫惟鳳爲能究萬物隨天祉象百狀達於道去則有災見則有福覽九州觀八極備文武正王國嚴照四方仁聖皆伏故得鳳之像一者鳳過之得二者鳳下之得三者則春秋下之得四者則四時下之得五者則終身居之黃帝曰於戲盛哉於是乃備黃冕帶黃紳齋於中宮鳳乃蔽日而降黃帝降自東階西面啟首曰皇天降茲敢不承命於是鳳乃遂集東園食帝竹實棲帝梧樹終身不去詩云鳳皇鳴矣于彼高岡梧桐生矣于彼朝陽蓁蓁萋萋離離喈喈

階此之謂也

風俗通昔黃帝使伶倫自大夏之西崑崙之陰取竹於嶰谷生其竅厚均者斷兩節而吹之以爲黃鐘之管制十二筩以聽鳳之鳴其雄鳴爲六雌鳴亦爲六天地之風氣正而十二律之五聲於是乎生八音於是乎出 謹按世本隨作笙長四寸十二簧像鳳之身

帝王世紀黃帝服齋於中宮坐於元扈洛上乃有大鳥鷄頭燕喙蛇頸龍形麟翼魚尾其狀如鶴體備五色三文成字首文曰順德背文曰信義膺文曰仁智不食生蟲不履生草或止帝之東園或巢阿閣其飲食也必自歌舞音如簫笙

竹書紀年

注

少昊登帝位有鳳凰之瑞或曰名清不居帝位帥鳥師居西方以鳥紀官

拾遺記少昊號曰窮桑氏亦曰桑丘氏至六國時桑丘子著陰陽書卽其餘裔也少昊以主西方一號金天氏亦曰金窮氏時有五鳳隨方之色集於帝庭因曰鳳鳥氏前編少昊之立也鳳鳥適至因以鳥紀官鳳鳥氏司曆正也

竹書紀年帝嚳高辛氏生而駢齒有聖德初封辛侯代高陽氏王天下使鼓人拊鞀鼓擊鐘磬鳳凰

鼓翼而舞

尚書中候堯卽位七十載鳳凰止庭巢阿閣謹樹

書經益稷篇簫韶九成鳳凰來儀注來儀者來舞而有容儀也

尚書大傳舜好生惡殺鳳凰巢其樹

尚書帝驗舜受終赤鳳來儀

史記五帝本紀四海之內咸戴帝舜之功于是禹乃興九招之樂致異物鳳皇來翔天下明德皆自

虞帝始

新序堯舜之誠感於萬國動於天地故荒外從風鳳麟翔舞下及微物咸得其所 昔者唐虞崇

舉九賢布之於位而海內大康要荒來賓麟鳳在郊

風俗通舜作簫其形參差象鳳之翼十管長一尺

路史有虞氏紀舜作大唐之歌以聲帝美聲成而絳鳳至故其樂曰丹張辟雍鷦鷯相從八風回回
鳳凰喈喈言其和也 舜踐天子之位少昊氏有裔子曰孟虧能馴鳥獸而致鳳凰爰封之蕭

吳越春秋禹納言聽諫安民治室居靡山伐木爲邑畫作印橫木爲門調權衡平斗斛造井示民以爲法度鳳凰棲于樹鸞鳥巢于側

周語內史過曰周之興也鸞鸞鳴於岐山

注

鸞鳳別名詩云鳳皇鳴矣于彼高岡其在岐山之脊乎

竹書紀年文王夢日月著其身又鸞鸞鳴於岐山孟春六旬五緯聚房後有鳳凰銜書遊文王之都前編商紂十有二祀周西伯治岐發政施仁鳳凰鳴於岐山

帝王世紀庖犧氏作瑟文王益其少宮南聽鳳以定律

尙書中候周公歸政于成王太平制禮鸞鳳見

陸賈新語周公躬行禮義郊祀后稷越裳奉貢重譯而臻麟鳳草木綠化而應

竹書紀年成王十八年春正月鳳凰見遂有事於河

注

成王援琴而歌曰鳳凰翱兮於紫庭余何德

兮以感靈賴先王兮恩澤臻于胥樂兮民以寧

汲冢周書王會解西申以鳳鳥鳳鳥者戴仁抱義掖信歸有德

注

其形似雞蛇首魚尾戴仁向仁國

抱義懷有義掖信歸有德之君也

方揚以皇鳥

注

方揚亦戎別名也皇鳥配於鳳者也

左傳莊公二十二年陳公子完奔齊齊侯使敬仲爲卿初懿氏卜妻敬仲其妻占之曰吉是謂鳳凰于飛和鳴鏘鏘有嬀之後將育于姜

昭公十七年秋鄴子來朝公與之宴昭子問焉曰少皞氏鳥名官何故也鄴子曰吾祖也我知之昔者黃帝氏以雲紀故爲雲師而雲名炎帝氏以火紀故爲火師而火名共工氏以水紀故爲水師而水名大皞氏以龍紀故爲龍師而龍名我高祖少皞摯之立也鳳鳥適至故紀于鳥爲鳥師而鳥名鳳鳥氏歷正也注鳳鳥知天時故以名歷正之官

說苑辨物篇晉平公顧謂師曠曰吾聞霸王之主鳳下之今者出朝有鳥環寡人終朝不去是其鳳乎師曠曰東方有鳥名諫珂其爲鳥也文身而朱足憎鳥而愛狐今者吾君必衣狐裘以出朝乎平公曰然

劉子新論審名篇楚之鳳凰乃是山雞注楚人擔山雉者路人問何鳥也曰鳳凰也路人弗惜千金販之欲獻楚王經宿而死

漢書昭帝本紀始元三年冬十月鳳凰集東海遣使者祠其處

宣帝本紀本始元年夏五月鳳凰集膠東千乘赦天下賜吏二千石諸侯相下至中都官宦吏六百石爵各有差自左更至五大夫賜天下人爵各一級孝者二級女子百戶牛酒租稅勿收 四年五月鳳皇集北海安丘淳于

地節二年夏四月鳳凰集魯郡羣鳥從之大赦天下

元康元年三月詔曰迺者鳳凰集泰山陳留甘露降未央宮朕未能章先帝休烈協寧百姓承天順地調序四時獲蒙嘉瑞賜茲祉福夙夜兢兢靡有驕色內省匪懈永惟罔極書不云乎鳳凰來儀庶尹允諧其赦天下徒賜勤事吏中二千石以下至六百石爵自中郎吏至五大夫佐史以上二級民一級女子百戶牛酒加賜鰥寡孤獨三老孝弟力田帛所振貸勿收

神爵二年春二月詔曰迺者正月乙丑鳳凰甘露降集京師羣鳥從以萬數朕之不德屢獲天福祇事不怠其赦天下 四年春二月詔曰迺者鳳凰甘露降集京師嘉瑞並見修興泰一五帝后土

之祠祈爲百姓蒙祉福鸞鳳萬舉蜚覽翱翔集止於旁齋戒之暮神光顯著薦鬯之夕神光交錯或降於天或登於地或從四方來集於壇上帝嘉嚮海內承福其赦天下賜民爵一級女子百戶牛酒

鰥寡孤獨高年帛

冬十月鳳皇十一集杜陵十二月鳳皇集上林

五鳳三年詔曰三月辛丑鸞鳳集長樂宮東闕中樹上飛下止地文章五色留十餘刻吏民並觀朕之不敏懼不能任屢蒙嘉瑞獲茲祉福書不云乎雖休勿休祇事不怠公卿大夫其勛焉

甘露三年春二月詔曰迺者鳳皇集新蔡羣鳥四面行列皆鄉鳳皇立以萬數其賜汝南太守帛百匹新蔡長吏三老孝弟力田鰥寡孤獨各有差賜民爵二級毋出今年租

郊祀志上自幸河東之明年正月鳳皇集祫祫於所集處得玉寶起步壽宮迺下詔赦天下後閭歲鳳皇神爵甘露降集京師赦天下其冬鳳皇集上林迺作鳳皇殿以答嘉瑞明年正月復幸甘泉郊泰畤改元曰五鳳

宋書符瑞志元康四年南郡獲威鳳

述異記當陽南有龍川鳳川云漢武帝時八龍五鳳常見於此亦呼爲五鳳州

論衡驗符篇宣帝時鳳皇下彭城彭城以聞宣帝詔侍中宋翁一翁一曰鳳皇當下京師集于天子之郊乃遠下彭城不可收與無下等宣帝曰方今天下合爲一家下彭城與京師等耳何令可與無

下等乎令左右通經者語難翁一翁一窮免冠叩頭謝

西京雜記揚雄讀書有人語之曰無爲自苦元故難傳忽然不見雄著太元經夢吐鳳皇集元之上
頃而滅

後漢書光武本紀建武十七年冬十月有鳳皇見於潁川之郟縣注東觀記曰鳳高八尺五彩羣鳥
並從行列蓋地數頃停一十七日

章帝本紀元和二年二月己未鳳皇集肥城五月戊申詔曰乃者鳳皇黃龍鸞鳥比集七郡或一郡
再見及白鳥神雀甘露屢臻祖宗舊事或班恩施其賜天下吏爵人三級高年鰥寡孤獨帛人一匹
經曰無侮鰥寡惠此熒獨加賜河南女子百戶牛酒令天下大酺五日賜公卿已下錢帛各有差及
洛陽人當酺者布戶一匹城外三戶共一匹賜博士員弟子見在太學者布人三匹令郡國上明經
者口十萬以上五人不滿十萬三人九月壬辰詔鳳皇黃龍所見亭部無出二年租賦加賜男子爵
人二級先見者帛二十四匹近者三匹太守三十匹令長十五匹丞尉半之詩云雖無德與汝式歌且
舞他如賜爵故事

安帝本紀延光三年春二月戊子濟南上言鳳皇集臺縣丞霍收舍樹上賜臺長帛五十匹丞二十四尉半之吏卒人三匹鳳皇所過亭郡無出今年田租賜男子爵人二級冬十月壬午新豐上言鳳皇集西界亭

注

今新豐縣西南有鳳皇原俗傳云卽此時鳳皇所集之處也

桓帝本紀建和元年十一月濟陰有五色大鳥見於己氏

注

續漢志曰時以爲鳳皇政旣衰缺梁冀

專權皆羽孽也

靈帝本紀光和四年秋七月河南言鳳皇見新城羣鳥隨之賜新城令及三老力田帛各有差

楊終傳終徙北地帝東巡狩鳳皇黃龍並集終贊頌嘉瑞上祀祖宗鴻業凡十五章奏上詔賞還故

郡

宋書符瑞志濟陽有武帝行宮常封閉哀帝建平元年十二月甲子光武將產乃開而居之時有赤光室中盡明皇考異焉是歲有嘉禾生產屋故名光武曰秀又有鳳凰集濟陽於是畫宮爲鳳凰之象

漢章帝元和二年以來至章和元年凡三年鳳凰百三十九見郡國

漢獻帝延康元年八月石邑縣言鳳凰集又郡國十三言鳳凰見

黃憲外史上林篇有五色鳥集于上林秦王喜而問曰寡人享西土之祿未有功德於敝邑之百姓而致珍禽寡人以爲鳳也不然則太液之池非無鳬鴈鵲鵲之鳥上林之苑非無鸚鵡翡翠之禽奚五章之若斯也寡人聞之西方之鳳曰鸛鵲意者其鸛乎若以爲然寡人將發私廩致百匠以修上林則何如徵君對曰吾聞淮南有鳥其名曰鵲南越有鳥其名曰鵲皆五色也昔者文王爲西伯修德行仁澤被南海是時也有鳥鳴於岐名曰鳳皇百姓陳路而歌羣臣埋庭而頌文王曰奚爲鳳乎是爾臣庶飾其所聞以重予過夫以文王之懿而讓岐山之鳴却臣庶之頌慎憚德之愆是以光昭於西土恩懷乎諸侯而爲受命之主世載厥休以茂有天下則文王之爲也今王之心度不類然臣恐指鹿爲馬之臣復覲面於秦庭矣

蜀志龐統傳統少時樸鈍未有識者潁川司馬徽稱統當爲南州士之冠冕由是漸顯注襄陽記曰諸葛孔明爲臥龍龐士元爲鳳雛司馬德操爲水鏡皆龐德公語也統德公從子也少未有識者惟德公重之年十八使往見德操德操與語旣而歎曰德公誠知人此實盛德也

古今圖書集成

魏志文帝本紀延康元年八月石邑縣言鳳凰集

魏略文帝欲受禪郡國奏鳳凰十三見明帝鑄銅鳳凰高三丈餘置殿前

吳志孫權傳黃武五年秋七月蒼梧言鳳凰見

黃龍元年春公卿百司皆勸權正尊號夏四月夏口武昌並言黃龍鳳凰見丙申南郊卽皇帝位

孫亮傳建興二年十一月有大鳥五見於春申

孫皓傳建衡三年西苑言鳳凰集改明年元鳳凰

吳歷大元元年有鳥集苑中似鷹高足長尾毛羽五色咸以爲鳳凰改元爲鳳凰

晉書武帝本紀泰始元年鳳凰六見於郡國 二年鳳凰六見於郡國 五年五月辛卯朔鳳

凰見於趙國

劉曜載記曜光初七年有鳳凰將五子翔於故未央殿五日悲鳴不食皆死

陸雲傳雲字士龍六歲能屬文吳尚書廣陵閔鴻見而奇之曰此兒若非龍駒當是鳳雛後舉雲賢

良時年十六

荀勗傳勗自中書監遷守尙書令勗久在中書專管機事及失之甚罔罔悵悵或有賀之者勗曰奪我鳳凰池諸君何賀我也

苻堅載記堅僭位五年鳳凰集於東闕大赦境內

宋書符瑞志晉武帝泰始元年十二月鳳凰見上黨高都鳳凰二見河南山陽鳳凰三見馮翊下邳穆帝升平四年二月辛亥鳳凰將九子見鄆鄉之豐城十二月甲子又見豐城衆鳥隨從 五年四月己未鳳凰集河北

五行志晉海西公初生皇子百姓歌云鳳凰生一雛天下莫不喜本言是馬駒今定成龍子其歌甚美其旨甚微海西公不男使左右向龍與內侍接生子以爲己子

晉書五行志石季龍時鄴城鳳陽門上金鳳凰二頭飛入漳河

二石僞事鄴中有鳳凰將九雛在延明門石外道西

鄴中記石虎詔書以五色紙著鳳雛口中

前秦錄甘露三年九月鳳凰集於東闕大赦其境內

華陽國志杜軫二子長子毗字長基少子秀字彥穎珪璋琬琰世號爲二鳳

一統志思鳳堂在榆次縣治晉荀勗爲令鳳集其境吏民爲之立碑

蘇州府志陽山東南則鳳現嶺過嶺爲鳳凰山晉太康二年掘地得玉鳳故名

宋書符瑞志宋武帝永初元年七月戊戌鳳凰見會稽山陰

文帝元嘉十四年三月丙申大鳥二集秣陵民王顓園中李樹上大如孔雀頭足小高毛羽鮮明文
采五色聲音諧從衆鳥如山雞者隨之如行三十步頃東南飛去揚州刺史彭城王義康以聞改鳥
所集永昌里曰鳳凰里

孝武帝孝建元年正月庚申鳳凰見丹徒愷賢亭雙鵠爲引衆鳥陪從征虜將軍武昌王渾以聞
何承天傳承天爲著作佐郎年已老諸佐並名家年少潁川荀伯子嘲之常呼爲嬾母承天曰卿當
云鳳凰將九子嬾母何言邪

南史謝靈運傳靈運子鳳凰子超宗有文辭盛得名譽選補新安王子鸞國常侍王母殷淑儀卒超
宗作誄奏之帝大嘆賞謂謝莊曰超宗殊有鳳毛時右衛將軍劉道隆在御坐出候超宗曰聞君有

異物可見乎超宗曰懸磬之室復有異物邪道隆武人無誠正觸其父名曰旦侍宴至尊說君有鳳毛超宗徒跣還內道隆謂檢覓鳳毛至闔待不得乃去

王僧虔傳僧虔父曇首與兄弟集會子孫任其戲適僧達跳下地作彪子僧虔累十二博碁既不墜落亦不重作僧綽採蠟燭珠爲鳳凰僧達奪取打壞亦復不較伯父弘歎曰僧達俊爽當不減人僧虔必至公僧綽當以名義見美或云僧虔採燭珠爲鳳凰弘稱其長者 僧虔子慈少與從弟儉

共書學謝鳳子超宗嘗候僧虔仍往東齋詣慈慈正學書未卽放筆超宗曰卿書何如虔公答曰慈書比大人如雞之比鳳

異苑東莞劉穆之字道和小字道人世居京口隆安中鳳凰集其庭相人韋薏謂之曰子必協贊大猷

南齊書五行志建武三年大鳥集東陽郡太守沈約表云鳥身備五采赤色居多案樂緯叶圖徵云焦明鳥質赤至則水之盛也

南史始安貞王道生傳道生三子長鳳次鸞是爲明帝明帝追封鳳始安靖王改華林鳳莊門爲望

賢門太極東堂畫鳳鳥題爲神鳥

祥瑞志世祖年十三夢鳳皇從天飛下青溪宅齋前兩翅相去十餘丈翼下有紫雲氣

江夏王鋒傳鋒年四歲性方整好學書五歲高帝使學鳳尾諾一學卽工高帝大悅以玉麒麟賜之曰麒麟賞鳳尾矣

梁書武帝本紀帝旣廢涪陵王爲東昏侯始受相國梁公之命建康令羊瞻解稱鳳皇見縣之桐下里宣德皇后稱美符瑞歸於相國府

元帝本紀大寶元年二月甲戌衡陽內史周弘直表言鳳皇見郡界

南史武帝本紀天監元年鳳皇集南蘭陵

陳書徐陵傳陵母臧氏嘗夢五色雲化而爲鳳集左肩上已而誕陵焉

魏書彭城王勰傳高祖與侍臣昇金墉城顧見堂後梧桐竹曰鳳皇非梧桐不棲非竹實不食今桐梧竹並茂詎能降鳳乎勰對曰鳳皇應德而來豈竹梧桐能降高祖曰何以言之勰曰昔在虞舜鳳皇來儀周之興也鸞鷟鳴于岐山未聞降桐食竹高祖笑曰朕亦未望降之也